



Memoria xustificativa do convenio-tipo de colaboración entre a Xunta de Galicia- Vicepresidencia e Consellería de Presidencia, Administracións Públicas e Xustiza e diversos concellos de Galicia para a execución de proxectos de infraestruturas, dotacións, instalacións e equipamentos vinculados á prestación de servizos municipais

1. Departamento que tramita o convenio

A Vicepresidencia e Consellería de Presidencia, Administracións Públicas e Xustiza é o órgano da Administración autonómica que, en virtude do Decreto 72/2013, do 25 de abril, polo que se establece a súa estrutura orgánica, ten atribuídas as competencias de elaboración, proposta e execución da política do Goberno Galego en materia de administración local e as competencias en materia de asistencia á Administración Local, así como o fomento das liñas de colaboración coas entidades locais.

Dentro deste departamento, as competencias en materia de Administración local están atribuídas á Dirección Xeral de Administración Local. A este centro directivo correspóndelle, en particular, o fomento das liñas de colaboración coas entidades locais galegas no referente á convocatoria e execución das subvencións a elas destinadas.

2. Antecedentes

A Lei 40/2015, do 1 de outubro, do réxime xurídico do sector público, e a Lei 5/1997, do 22 de xullo, de Administración Local de Galicia (en adiante LALGA), recollen ao longo do seu articulado o principio xeral de colaboración interadministrativa.

Entre as competencias que lle corresponden á Xunta de Galicia en materia de relacións coas entidades locais galegas, de acordo co disposto nos artigos 194 e 195 da LALGA, figuran as de cooperación e colaboración, mediante subvencións eventuais ou continuas, que poderán materializarse, entre outras posibilidades, a través da subscripción de convenios.

Neste mesmo senso, o artigo 48 da Lei 40/2015, do 1 de outubro, de réxime xurídico do sector público, establece que as administracións públicas, os seus organismos públicos e entidades de dereito público vinculados ou dependentes e as universidades públicas, no ámbito das súas respectivas competencias, poderán subscribir convenios de colaboración con suxeitos de dereito público e privado, sen que isto poida supor cesión da titularidade da competencia.

O Decreto 72/2013, do 25 de abril, polo que se establece a estrutura orgánica da Vicepresidencia e da Consellería de Presidencia, Administracións Públicas e Xustiza, configura esta como o departamento da Xunta de Galicia ao cal lle corresponde a elaboración, proposta e execución da política do goberno en materia de administración local, emerxencias e interior, entre outras.

As competencias en materia de Administración Local están atribuídas á Dirección Xeral de Administración Local e a este centro directivo correspóndelle, en particular, o fomento das liñas de colaboración coas entidades locais galegas no referente á convocatoria e execución das subvencións a elas destinadas.

Segundo dispoñen os artigos 25 e 26.1 da Lei 7/1985, do 2 de abril, reguladora das bases do réxime local e os artigos 80 e 81 da Lei 5/1997, do 22 de xullo, de Administración Local de Galicia, os concellos deberán prestar á súa cidadanía aos servizos públicos que contribúan a satisfacer as necesidades e aspiracións da comunidade de veciños.

3. Finalidade

Para a execución de proxectos que teñen como finalidade a creación e/ou mellora de infraestruturas, dotacións, instalacións e equipamentos vinculados á prestación de servizos municipais, tense previsto formalizar os instrumentos convencionais ao que se refire esta memoria, por un período de vixencia que abrangue desde o día da súa sinatura ata o 31 de outubro de 2018.





4. Obxecto do convenio

Os convenios teñen por obxecto fixar as liñas de colaboración entre a Xunta de Galicia, a través da Vicepresidencia e Consellería de Presidencia, AAPP e Xustiza e os concellos para o desenvolvemento de proxectos que teñen como finalidade a creación e/ou mellora de infraestruturas, dotacións, instalacións e equipamentos vinculados á prestación de servizos municipais. Consideraranse subvencionables aqueles proxectos que teñan por obxecto:

- a) Instalación, ampliación ou mellora das redes de luz pública.
- b) Pavimentación de vías públicas municipais.
- c) Construción, mellora, ampliación ou rehabilitación de espazos públicos: prazas, paseos, rúas, parques públicos e parques infantís.
- d) Construción, mellora, ampliación ou rehabilitación de edificios ou dependencias municipais destinados á prestación de servizos básicos e/ou dotación de equipamentos destes edificios ou dependencias.
- e) Construción, mellora, ampliación ou rehabilitación de instalacións deportivas de uso público e/ou dotación de equipamentos das referidas instalacións.

Para os efectos desta orde terán a consideración de servizos básicos aqueles recollidos no artigo 26 da Lei 7/1985, do 2 de abril, reguladora das bases de réxime local.

O obxectivo común é contribuír a que os concellos poidan prestar servizos de calidade á veciñanza con independencia do seu lugar de residencia.

5. Fundamentos do convenio

A Vicepresidencia e Consellería de Presidencia, Administracións Públicas e Xustiza regulou, por medio da Orde do 4 de decembro de 2017, a concesión de axudas económicas aos concellos de Galicia, en réxime de concorrència competitiva, destinadas á creación e/ou mellora das infraestruturas, dotacións, instalacións e equipamentos vinculados á prestación de servizos municipais, destinados a concellos de Galicia para o ano 2018 (DOG núm. 5, do 8 de xaneiro).

Mediante a devandita orde a Xunta de Galicia materializou a súa vontade de colaborar cos concellos na implantación e mellora dos servizos básicos demandados pola poboación. A convocatoria, instrución e resolución do procedemento iniciado pola antedita orde, finalizou coa concesión de axudas a todos os concellos solicitantes que cumprían os requisitos esixidos polas bases reguladoras e acadaron a puntuación mínima determinada pola Comisión designada para a valoración dos proxectos, ata o esgotamento do crédito destinado ao financiamento da convocatoria.

Logo da tramitación desta convocatoria, no concepto orzamentario que a financia, e dentro do código de proxecto 2017 00054 Proxecto de desenvolvemento dos entes locais existe un saldo de crédito, financiado exclusivamente con fondos propios da Comunidade Autónoma, que se considera axeitado e suficiente para a súa aplicación eficaz na colaboración coas entidades locais de Galicia na mellora na calidade da prestación dos servizos municipais.

Por esta razón, a Vicepresidencia e Consellería de Presidencia, Administracións Públicas e Xustiza, no exercicio das súas competencias, pretende colaborar coas entidades locais apoiando aquelas actuacións cuxa finalidade sexa a creación e/ou mellora de infraestruturas, dotacións, instalacións e equipamentos vinculados á prestación de servizos municipais naqueles concellos que amosaron o seu interese para obter unha axuda destinada á execución deste tipo de proxectos mediante a presentación dunha solicitude ao abeiro da devandita convocatoria en concorrència competitiva, pero non puideron acceder a ela por non ter acadado a puntuación mínima determinada pola Comisión de Valoración.

A Xunta de Galicia presta así un apoio especialmente necesario neste caso, considerando as particulares circunstancias destes concellos, que veñen incidir nun contexto orzamentario restritivo e necesariamente estable do que deriva, entre outras consecuencias, as dificultades para afrontar en solitario os





compromisos económicos que o obxecto destas subvencións representa para as facendas municipais, que precisan da creación ou mellora das infraestruturas para a adecuada prestación dos servizos municipais.

Xa que logo, instrumentaranse mediante convenio as axudas para os proxectos promovidos por aqueles concellos que presentaron solicitude ao abeiro da Orde do 4 de decembro de 2017, que non resultaron beneficiarios por esgotamento do crédito destinado ao financiamento desta convocatoria, ata un importe máximo total de 500.000,00 €, respectando a orde de prelación que estableceu a Comisión de valoración prevista na devandita convocatoria. Os concellos e os proxectos subvencionables son os que se relacionan a continuación:

CONCELLO	PROXECTO	ORZAMENTO	IMPORTE MÁXIMO DA SUBVENCIÓN	%
Arnoia, A	Mellora de edificio municipal no concello de Arnoia	21.108,79	12.665,27	60,00%
Baralla	Mellora e ampliación da iluminación pública da área recreativa de Baralla	40.000,00	24.000,00	60,00%
Beariz	Acondicionado parques infantís en Magros e Beariz	39.980,94	23.988,56	60,00%
Becerreá	Renovación parque infantil en Becerreá en praza do Concello	38.962,00	23.377,20	60,00%
Bóveda	Climatización da casa do concello de Bóveda	59.971,40	35.982,84	60,00%
Carballedo	Renovación de instalacións de iluminación exterior. Situación; rúa Irmáns Fernández Dorrego	50.000,00	30.000,00	60,00%
Cenlle	Rehabilitación de dependencias destinadas á prestación de servizos básicos	20.125,16	12.075,10	60,00%
Coirós	Mellora rede de iluminación pública en Recebes-Loureiros (Coirós)	50.000,00	30.000,00	60,00%
Entrimo	Reforma da planta baixa da casa do concello	50.000,00	30.000,00	60,00%
Gudiña, A	Mellora e arranxo de firmes en Carracedo da Serra	50.000,00	30.000,00	60,00%
Irixo, O	Pavimentación de vías municipais no concello do Irixo	48.399,99	29.039,99	60,00%
Larouco	Mellora de pavimentación e rehabilitación na rúa Iglesia Vella de Larouco	44.000,00	26.400,00	60,00%
Monterroso	Acondicionamento de local municipal para arquivo municipal	40.000,00	24.000,00	60,00%
Pino, O	Renovación da instalación de iluminación pública na parroquia de Arca: lugar de Vilaboa e outros	55.772,64	33.463,58	60,00%
Pol	Rehabilitación e ampliación da biblioteca municipal	50.000,00	30.000,00	60,00%
Rairiz de Veiga	Mellora de infraestruturas municipais en Rairiz de Veiga	40.000,00	24.000,00	60,00%
Sober	Urbanización da praza do concello. Fase II	60.461,15	36.276,69	60,00%
Vedra	Execución de acondicionamento de camiño en Paizás, Trobe	47.746,53	28.647,92	60,00%
		TOTAL	483.917,15	

Garantidos os principios de concorrencia, transparencia, publicidade, obxectividade, igualdade e non discriminación mediante a convocatoria, instrución e resolución do procedemento iniciado pola Orde do 4





de decembro de 2017, a existencia dun saldo de crédito susceptible de aplicación eficaz na eliminación das carencias nas infraestruturas de uso público sobre as que se actuará a través dos convenios que se pretende subscribir, e considerando inviable unha nova convocatoria que teña por obxecto este tipo de actuacións polo custo temporal da tramitación dun procedemento destas características, enténdese suficientemente acreditadas as razóns de interese público que xustifican o recurso ao procedemento excepcional de concesión directa dunha subvención.

6. Aplicación orzamentaria e importe

Para dar cumprimento aos obxectivos destes convenios, a Vicepresidencia e Consellería de Presidencia, Administracións Públicas e Xustiza, a través da Dirección Xeral de Administración Local, destina a cantidade máxima de 483.917,15 € dentro do proxecto orzamentario 2017 00054, achegando para cada convenio unha cantidade que pode acadar ata o 60% do orzamento total do proxecto (IVE incluído), co límite de 40.000,00 € por entidade beneficiaria.

Estes gastos financiaranse con cargo á aplicación orzamentaria 05.23.141A.760.2 dos orzamentos xerais da Comunidade Autónoma para o ano 2018, na que existe crédito adecuado e suficiente.

Con base en todo o anterior

ACORDO

1. Iniciar os trámites en orde á tramitación dos convenios de colaboración entre a Xunta de Galicia, a través da Vicepresidencia e Consellería de Presidencia, Administracións Públicas e Xustiza, e distintos concellos de Galicia para a execución de proxectos que teñen por obxecto creación e/ou mellora de infraestruturas, dotacións, instalacións e equipamentos vinculados á prestación de servizos municipais.
2. Solicitar informe á Asesoría Xurídica, á Dirección Xeral de Planificación e Orzamentos e á Intervención Delegada.

A directora xeral de Administración Local

Marta Fernández Tapias-Núñez

Documento asinado dixitalmente á marxe

